



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 10

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 3



om Moody-i India coach  
mapa inyakner



NMC-i Lakhimpur nung medical  
college amenoktsü melaogo

VOL. XIX NO. 5 (ADOK 5) DIMAPUR

SANGTENNÜ (TUESDAY) MONGPUTENI (OCTOBER) 12, 2021

₹ 5.00

## Nagaland sorkari September 7, 2021 tetuyuba agiener Dimapur district indang headquarter ji Dimapur lir: Y Patton

**Dimapur, October 11, 2021 (TYO):** September 7, 2021 nung Nagaland sorkari tetuyuba agütsüba meyipa agir aser district indang headquarter ji Dimapur lir, ta Hombarnü Nagaland Dy. Chief Minister Y Patton-i osang jangjatsüogo.

Civil Society Organisations (CSOs) ajanga "HQ Chümoukedima and Camp Dimapur" amshiyim indang ashiba Home Department-i reprangshimtsü aser ibaji Cabinet nung benoka jembiba sülen CSOs nem osang metetdaksütsü, ta Y Patton-i ashi.

Hombarnü Police Complex, Chümoukedima nung CSOs, Principal Secretary, Home, Abhijit Sinha, District Administration ketdangsurtem aser Dimapur district MLA tem-Tovihoto Ayemi, Zhaleo Rio, Moatoshi Longkumer aser Azheto Zhimomi nung senden ka

amenba sülen Dy. Chief Minister-i iba ya osangbener dang ashi.

Ki tasen nung Sub-Treasury Office tasen ka lapoktsü aser iba denji ADC aser EAC office tem amenoktsü, ta paisa ashi.

Chümoukedima nung ADC ji tasen shimtsü asü DC Office nung aliba ADC belentsü ta osangbenertemi asüngdangdang "iba onükji cabinet nung benoka jembitsü" ta Patton- langzü.

CSOs ajanga HQ aser camp tags amshiba magizüker ta ashiba onük reprangshimtsü ta Principal Secretary, Home, Abhijit Sinha-ia metetdaksü.

"Senden nung telemetba tajungtem agiogo aser sorkari tongtipang onüktem atema mapa inyaktsü nangzükogo. Sorkari September 7 nü tetuyuba agütsüba agientsü aser iba sülen onoki lungkak aitba anentsü" ta CSOs lennir kati ashi.

## COVID-19 Nagaland: Nisung kasasa dak putet & taneptsü angu

**Kohima, October 11, 2021 (TYO):** Nagaland nung Hombarnü nisung COVID-19 puteter aser taneptsü angur kasasa liasü. Tanü nisung 24 dak COVID-19 putet aser külen 24 taneptsü angu.

"Tesüba ghonda 24 tsüngda nisung 24 dak COVID-19 aliba putet. Parnokji Dimapur nung 17, Tuensang nung 3, Mokokchung nung 2 aser Peren o Phek nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang COVID-19 agi shiranger nisung 24 taneptsü angu. Parnokji Dimapur nung 19 aser Kohima, Mokokchung, Mon, Tuensang o Wokha nung kaka (1) lir" ta paisa ashi.

Nisung 31,473 rongnungji 29,529 taneptsü nguogo aser ibaji 93.82% lir, ta Dr Kikon-isa

ashi. Tang nisung 257 anepaludar saka parnok 190 dakbo shirangba yimya kecha mali, ta paisa shisem.

"Deobar tashi nung nisung 696,188 nem COVID-19 vaccine indang dose 11,06,828 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,943, healthcare workers 15,997, arishi küm 45 ser temapur 199,662 aser arishi küm 18 nungi 44 tsüngda alir 419,586 lir" ta paisa ashi.

"Vaccine agirtem rongnungji nisung 410,640-i dose anaprong agiogo. Parnokji frontline workers 47,606, healthcare workers 13,306, arishi küm 45 ser temapur 145,638 aser arishi küm 18 nungi 44 tsüngda alir 204,089 lir" ta Dr Thurr-isa metetdaksü.

## NCSK Chairman Venkatesan-i Dimapur semdang



Tanü Dimapur Airport nung M. Venkatesan arudang tangokba noksa nung angur. (Dimapur Oct. 11, 2021)

**Dimapur, October 11, 2021 (TYO):** National Commission for Safai Karamcharis (Rank and Status of Union Minister of State) Chairman, M. Venkatesan tanü Dimapur tonga aruogo.

Tanü Dimapur Airport nung ADC Dimapur Atokhe Aye, DMC Administrator Albert Ezung aser State Protocol officers-i pa pelaa

agizük.

Dimapur atongba sülen Venkatesan-i Chumukedima Village Council Hall nung oa Safai Karamcharis aser Union lennirtem den senden ka amen. Iba senden nung ADC Dimapur Atokhe Aye aser DMC Administrator Albert Ezung na aden.

## 1971 rara nung shilem agiba Naga nung 8 nem tetushi agütsü

**Kohima, October 11, 2021 (TYO):** 1971 küm Pakistan den rara nung takok anguba sülen küm 50 ajungba tenung nung Swarnim Vijay Varsh milak tanü Kohima tongogo.

Hombarnü Naga Hills War Memorial nung Inspector General of Assam Rifles (North) Maj Gen VPS Kaushik-i Swarnim Vijay Varsh milak agizük.

"December 16, 2020 nü Prime Minister Narendra Modi-i National War memorial nung mi tsükloksü aser iba sülen jila o yimi aika süia arur Kohima tonga bener aruba ya konang tulu lir" ta Maj Gen Kaushik-i ashi.

Iba milak ya Northeast kübok State asem - Meghalaya, Assam aser Arunachal Pradesh süia bener aruba sülen anogo ananü Nagaland nung yur Manipur-i bener aotsü, ta paisa ashi.

"Iba milak ya otsüsütsü aketba 1971 rara nung linük sepaitemi

tashi ita raraba tamaitü lir" ta Maj Gen Kaushik-isa metetdaksü.

Kohima aser temeket nung 1971 war veterans 8 nem akhümtsübu tetushi agütsür. Nenok ama tasütait sepaitemi 1971 rara nung takok ngudaksü. Nenok ajanga nisungtem akasodaktsür aser lanurtemi nenok tsüngsü sülen anidaksü ta amanger" ta paisa ashi.

Tanü agiba sentong nungsa 1971 rara nung Naga war veterans nem tetushi agütsü, Garrison War Memorial nung nari yutsü, süngdong atem aser India o Pakistan tsüngda 1971 rara indang documentary movie ka sayu.

### Nagaland nungi 1971 war veterans:

1st Naga Regiment nungi Ex-Subedar Kivihe Sema, Ex-Naik K Vishito Sema, Ex-Naik Inakhe Sema, Ex-Subedar Ghuzhukha, Ex-Naib Subedar Shikheyi

Sangtam aser Ex-Naib Saluvi Sema.

6 Assam Regiment nungi Ex-Naik Virheito Angami.

1st Naga Regiment nungi sepaitemi ajak Dhaka nung aser Ex-Naik Ngutsolie Angami ya Berali, Uttar Pradesh nung mapa lemzüka liasü.

Tanü agiba sentong nung Nagaland Director General of Police, T J Longkumer, IGP (Int) Martin Pienyü aser armed forces balala nungi ketdangsurtem aden.

1971 rara nung Indian Armed forces-i tasü ita raraba ajanga East Pakistan nung Dhaka makdok, Pakistan sepai 92000 temai bendanga agütsü aser Bangladesh linük balaka kümet.

India nung kümshia December 16 nü Vijay Diwas amonger. Iba ya 1971 War nung Pakistan madak takok anguba aser Bangladesh linük kümetba bilemteta amonger.

## Nagaland nung power supply shitak agütsütsüla: K Therie

**Dimapur, October 11, 2021 (TYO):** Nagaland state sorkari power supply atema tebilemstü mabener aser küm 18 tashi sorkar yimsü süa aruka power supply tajungba mekümdaktsür, ta NPCC President, K Therie-i ashi.

Nagaland nung power supply shitak magütsüba ajanga kidang power ajanga amshiba osettem raksar, industry maparen nung timtem ajurur aser hospital, hotel aser ki ajak nung generator, inverter aser solar power nungdaker aser iba nung sen aika endoker, ta pai metetdaksü.

Mopung tera aon mesüra tzunglu tera aru nunga power supply mangur. Anogo ka danga power supply shitak anguba mali, ta paisa ashi.

"Ni Power Minister nungi anentsüba lia India sorkari Dimapur nung Transmission & Distribution atema Rs 78 crores agütsü aser ni idangji ni Transformer tem ulushitsü aser cable lines agütsütsü tebilemba

liasü. Asenoki item mapaji inyaktsü koka lir saka sorkar tebilemstü mabener" ta Therie-isa ashi.

Nagaland nung 200 MW shi ka dang nungdaker aser power adoktsüsa ayongtem peria dang lir. State sorkari küm 20 tejakdang Thermal Power Station ka yanglutsüba telemetba agi aser iba atema ali-a aliogo saka tashiyim agi sen saruba teseptem tentetba ajanga mapa meinyakteter, ta paisa metetdaksü.

"Nagaland nung mapa tulu ka inyaktsü ta süra tashiyim agi sen sarutsü atema teseptem amenoker. Ni Power Minister inyakdang Likhimro Hydro Project aser NEPCO Doyang Hydro Project mapa kanga saksaka inyaka liasü" ta NPCC President-isa ashi.

"Nagaland nung power supply shitak mengutetba khurettem rongnung transmission aser distribution lines indang khuret lir. Centre-i

sen aika agüjaka transformer teimba ka tila lir aser material supplies nung ochimashi mapa tulu inyaker" ta paisa ashi.

"Nagaland state sorkari power alizükba atema sen crore 300 agütsür aser consumer dang nungibo sen crore 150 shi dang angur ta ashir. Iba tetezüji sen 50% mangur saka online bills ya treasury nung head balaka nung enoktsüra sen 50% dangbo mesarutetsü" ta K Therie-isa ashi.

"Ni Power Minister inyakdang taoba Chief Engineer Er. Lanu Toy lenisüba kübok Power Department liasü. Iba sülen taoba Chief Engineer Er. H Sema-i Er. Lanu melenzük aser paia Er. Lanu tsüngsü sülen anidaka mapa tajung inyak. Tenati kü nem shisatsü agüja nungita yari. Tanü kechisa inyakteta lir ibaji Department tashi ajanga inyakba liasü aser tanü-a sorkari dang nungitra Department-i mapa tulu inyaktsü amanger" ta K Therie-isa ashi.

## Nagaland nung classical & folk dance indang sentong agi

**Dimapur, October 11, 2021 (TYO):** October 11, 2021 nü Christian Higher Secondary School Auditorium, Dimapur nung "Bridging Classical and Folk Dance of Nagaland" ta ser sentong ka ayonga agiogo.

Iba sentong ya North East Zone Cultural Center (NEZCC) Ministry of Culture, Government of India-i Vivekananda Welfare Foundation (VWF) den yaritepa ayongzük.

Iba sentong nung Special Judge Posco Court Dimapur, V. Nyekha, DPRO Dimapur, Lolano Patton aser Indigenous Cultural Society Dimapur Nagaland and President, Nagaland NGOs Forum nungertemi alakteta jaokertem ama shilem agia liasü.

"VWF Dimapur aser NEZCC-i Nagaland ajungalen classical aser folk dances ajungkettsü asoshi inyaktsü ajungshir. India sorkari state balala indang sobaliba asentenshitsu atema mapa inyaker anungji Nagaland kübok districts headquarters ajak nung iba osang proktsüla" ta V. Nyekha-i ashi.

Lolano Patton-ia o jembidang NEZCC aser VWF ajanga sentong tajung ayongzükba atema tenüngsang agütsü.

"Tesem balala nung sobaliba balala liaka nübertem dang longjema alitsü osang sangoktsüba ya kanga tongtipang lir. Iba ajanga asenok ka dang ta asüba sayur aser 'temeyoktep nung telongjem' ta asüba yimiyim ayimoktsür" ta Lolano Patton-isa

metetdaksü.

VWF Dimapur-i Covid 19 wara nung nübertem yariba mapa balala nung shilem agiba atema Lolano-isa District Task Force Dimapur tenung nung parnok dang pelaba ashi.

Dr. Hesheto-ia o jembidang VWF Dimapur nem tenüngsang agütsü.

"Nagaland nung NGOs 33000 shi aliba nung VWF ya NGO tajungtiba rongnung ka lir" ta Dr. Hesheto-i metetdaksü.

Iba sentong nung Chief Coordinator, Manisha Borkotoki-i tesentepertem pelaa agizük, Secretary VWF-i parnoki inyakba osang lemsatet aser Coordinator, Priya Bhattacharjee-i anküp tepela o jembi.

## Nagaland online short film competition alitsü



East Gate Hotel, Kohima nung October 11, 2021 nü Film Association of Nagaland nung ketdangpurtemi osangbener senden ka nung jembiba mapang tangokba noksa ka yangi angur.

**Kohima, Mongputeni/Oct. 11 (TYO):** Film Association of Nagaland (FAN) ajanga October 12, 2021 nungi November 12, 2021 tashi State nung COVID-19 tensa den apet "The New Normal" onük nung online short film competition ayongzüka agitsü.

Iba tetoktepba alitsü osang ya East Gate Hotel, Kohima nung osangbener senden ka Hombarnü alidang, FAN tir Kivini Shohe aser secretary Yapangnaro nati sangdonga liasü, kong Asangla Imsong, Joint Director of Directorate of Information and Public Relations (DIPR) dena liasü. Nagaland nung film tem atema DIPR ya Nodal Department lir.

DIPR aser Task Force for Music & Arts (TaFMA) den lungjemer ayongzüka tetoktepba nükjidong ya lanurtem nem 'serious content' yangludaktsütsü ajungshitsü atema lir, ta Shohe-i ashi aser iba mapang nisungtemi otsü aika lemsateptsü, talisa tashidak wara agi tesem ajunga sünger

lia ajangshibatem lemsateptsü imlaba ashi.

Tarutsü anogotem nung FAN ajanga ostü ashir temaba jenjangi ajungkettsü sentong lir, ta lai ashi.

Iba short film competition nungya Nagaland nung aliba mashi kati shilem agitetsü aser yangi tenokdangba kecha mali, ta Yapangnaro-i ashi.

Nüburtemi yimya tasen nung alitsü merangba sayutsü aser COVID-19 tashidak wara sülen yimya tasen nung film tem yanglutsü nükjidong nung iba omen ya shimtet, ta lai ashi.

FAN ajanga iba tetoktepba osang ya Nagaland Film Festival 2021 mapang sangdongtsü sentong lir, koba Hornbill Festival mapang agitsü tebilemba benoka lir, ta laisa ashi.

DIPR Joint Director Imsong ajanga film dak sendakba nung Department-i maparen balala inyakba indang lemsatepa liasü.

Lai ashiba agi, Nagaland Film Festival edition tasembuba ya tashidak wara dak sendakba tensa ajema kumra Hornbill

Festivall, 2021 mapang agitsü tebilemba lir.

Department-i tang Nagaland indang film policy nung inyaktepba mapang ka lir, koba state nung film industry tensa den apet yanglutsü, ta Imsong-i ashi.

Iba tetoktepba nung temaba takok angur nem senpet sen 25,000 den kulikaket, tanabuba jenjang nguteter nem senpet sen 15,000 den kulikaket aser tasembuba jenjang nguteter nem senpet sen 10,000 den kulikaket agütsütsü, ta FAN ajanga metetdaksü.

Film ya talangtiba agi minute 10 asütsüla aser file size ya 700 MB tashi asütsü akok, koba phone mesüra video camera nungi tangokba asütsüla, ta FAN ajanga ashi.

Film indang oshi ya English asütsüla mesüra tetsü oshi mashi ka süaka English subtitles alitsüla.

Film tem ya email ajanga filmassociationofnagaland@gmail.com dangi November 12, 2021 tashinung yoktsüla, ta ashi.

## BLK-Max Super Speciality Hospital ajanga CME training agütsü

**Kohima, Mongputeni/Oct. 11 (TYO):** BLK-Max Super Speciality Hospital, New Delhi ajanga Naga Hospital Authority, Kohima den lungjemer Continuing Medical Education (CME) training programme ka takok ngua agiogo, kong Minimally Invasive Spine Surgery aser Robotic Oncology Surgery amala advanced medical procedures indang sayua liasü.

CME sentong ya Hotel Vivor, Kohima nung ayongzüka agi, kong state balala nungi doctor 30 shi dena liasü. Field balala nung doctor tem nem training agütsütsü aser parnoki temolung meleme bilemba jangjashitsütsü nükjidong nung iba training ya agütsü.

Doctor tem tanü-asüng technology den lirumedema aser parnoki shimtetba wadang nung tajungtiba agi inyaktsü asoshi iba sentong ya ayongzüka liasü.

'Minimal Invasive Spine Surgery - Changing Paradigm' indang jembiba mapang, Dr Puneet Girdhar, Senior Director & HOD, BLK-Max Centre for

Ortho Spine Surgery ajanga ashiba agi, iba CME program nung asenoki microendodissectomies ama minimally invasive procedures, minimally invasive spinal decompressions aser item maparen inyakba mapang yimya balala amshiba, itemji ajanga surgery agiba teyari aser shirangertem nem teyari agütsüba indang jembir.

Küm süitema arudang temelenshi aser terenlok jenti lir aser ibaji ajanga operation agir taneptsü anguba mapang ajemdaktsütsüsa aser timtem madoktsüsa spine surgery tajungtiba nung agiteter. Practitioner lanurtemi khuret süa bilembatem nung temolung süa telangzüba agütsüteter südi ta amanger, ta pai ashi.

Dr Chandragouda Dodagoudar, Associate Director - Medical Oncology, BLK-Max Cancer Centre ajanga Medical Oncology nung tawa tajungba kuma yanglushiba indang rasaa ashi.

"Iba sentong nung tangazükba jenti lir aser cancer science, cancer immunotherapy

asur novel cancer therapeutics indang technology tajungba nung angateter. Asenoki imaging technology aser interventional radiology ama novel techniques amshia aoba mapang tanü angazükba tem amshia aotsü imlar," ta Dr Chandragouda-i ashi.

Iba sentong nung Dr Imtiakum Jamir, Consultant - HPB Surgery & Liver Transplantation, BLK-Max Institute for Digestive & Liver Diseases ajanga Liver Transplant clinicians temi inyaktsüba indang tejangja ashi.

"Temesen nung tashidak advanced stages nung alirtemi cadaveric transplant (tetenlar sür agitsü) atar. Yamaji ataba ya takzütetsü makok aser shiranger kar tetenlar indang temesen ataba mapang asür. Ano takum alir temi tenlaba temesen ya shirangeri kangasa nüngdakba mapang agütsüteter aser ibai sentong yanglur agiba operaton ka sünung team ajunga renemer ata alir. Liver Transplant ICU tajung aliba ajanga tajangzük jenti alitsü," ta pai ashi.

(Maneni tapak 3 nung ...)

## NIIT Dimapur ajanga metetdaksür

**Dimapur, Mongputeni/Oct. 11 (TYO):** Durga Puja aser Dussehra benjongmung tenü nung NIIT Dimapur Center nung October 12 nungi October 15, 2021 tashi class magitsü, ta Daniel Changkiri, Head of Center, NIIT Dimapur Center ajanga

sangdong ka nung metetdaksü. Iba benjongmung ajanga Nagaland nung aliba nüburtem ajunga asoshi temoatsü lidakjang ta moatsür. Center ya October 16, 2021 nü tanaben lapoktsü, ta sangdong ajangasa ashi.

## KLC nung legal awareness campaign tenzükogogo



Kohima Law College nung October 11, 2021 nü legal awareness campaign tenzükba mapang Asst. Professor & NVCO tir Kezhokhoto Savi den KLC final year students tem külemi tangokba noksa ka yangi angur.

**Dimapur, Mongputeni/Oct. 11 (TYO):** Küm shia Kohima Law College (KLC) ajanga legal awareness campaign ayongzüka akar, saka COVID-19 tashidak wara mechi taoba küm iba sentong mayongzüktet. Ajisüaka tensa tajungba akumba ajanga nüburtem nem awareness tajungtiba agütsütsü nükjidong nung iba sentong ya college telungzük nung October 11, 2021 nü tenzükba liasü. Iba sentong ya Asst. Professor aser Legal clinical education/BCI Practical Papers indang In-charge, Kezhokhoto Savi-i tenzükba liasü.

Iba legal awareness campaign ya tongtipangsa LL.B VI semester student pur atema tenzüksüba lir, kong parnoki Consumer Rights, Environment Protection, National Food Security Act, Food Safety and Standard Act, Lokayukta, Human Rights, Nagaland State Consumer Helpline with Tool Free No. 1800-345-0370, Public Service Delivery System, Article 371A of Indian Constitution, Rights of street vendors amala onüktem nung ajemdaker shilem agitsü.

LL.B final year students

temia iba sentong nung shilem agia onük balala nung jembia liasü, koba ajanga parnok legal professional practices nung tetsüng ajemokba mapang teyari alitsü.

Asst. Professor, Kezhokhoto Savi, shiba Nagaland Voluntary Consumer Organisation tir lir, pai 'Consumer Rights' nung ajemdaker legal awareness campaign amala ayongzüksü kanga tongtipang lir, kechiaser conusemer nem Food Safety & Standard Act aser National Food Security Act amala angatetdaksütsüla, ta ashi. Ajidang masü state sorkari Consumer Protection Act, 2019 mapa kuma inyaktsüla, ta pai ashi.

Indian Constitution indang Article 371A ya süoki ia bilemdangtsüla, kechiaser terenlok, state rongsenketzüng, banking loan amala tenü nung iba article nung kongshir, ta pai ashi.

Human Rights indang awareness agi anünga lir aser state sorkari tang tashi State Human Rights Commission ka mamenokteter, ta Savi ajangasa ashi.



Dimapur, Mongputeni/Oct. 11 (TYO): International Day of Girl Child anogomung bilemteta District Hospital, Mon nung "Rise up for a better world" omen nung ajemdaker sentong ka agia liasü. Iba sentong ya Department of Social Welfare, Government of Nagaland kübok District Child Protection Unit (DCPU) Mon ajanga Childline and Child Welfare Committee, Mon den lungjemer ayongzüka liasü.

## NMC-i Lakhimpur nung medical college amenoktsü melaogo



Assam CM, Himanta Biswa Sarma medical college tasen ka lapoktsü sangokja liasü.

**Lakhimpur, October 11, 2021 (Agencies):** National Medical Commission (NMC)-i Assam indang Lakhimpur district nung medical college tasen ka yanglutsü asoshi temelaba agütsüogo.

Hombarnü Assam chief minister Himanta Biswa Sarma ajanga iba osang sangokja liasü.

Assam nung medical college tasen dang Lakhimpur Medical College Hospital (LMCH) ta ajatsü aser iba mozüki nung

MBBS (Bachelor of Medicine and a Bachelor of Surgery) atema menden 100 alitsü.

Tang NMC nungi temelaba ngua Assam nung MBBS seat 1100 tashi akümtsü.

"Assam atema alizüing tongtibang ka ajangzükettsü asoshi, @NMC\_IND-i Lakhimpur atema Medical

College tasen ka den MBBS atema menden 100 agütsütsü melaba atema pelaba lemsateper. Iba osang angashia

nüma-atanger kechiyong college 8buba maparen inyaksü mangdang aliba asangsang nung ataloker. Tang, State nung asen chirnurtem atema #MBBS seats 1100 shi angutsü" ta Assam chief minister Himanta Biswa Sarma-i Twitter ajanga lemsatep.

Taküm August ita National Medical Commission (NMC)-i Lakhimpur Medical College & Hospital (LMCH) semdanga liasü aser iba college nung metokmeperiba kar talisa faculty peria maliba, casualty ward tasazük aser kisüjensü maparen merenemba ngutet.

Itemji asadanga, NMC-i 2021-22 indang academic session atema LMCH nung MBBS courses atema admission memela.

Ajisüaka, item maparen renemba sülen, NMC-i Lakhimpur, Assam nung medical college atema melaogo.

**Piles Anepaluba** - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Altjma agi ni kangshia liasü aser Rectum nungi azü alu dang mapang talangka item timtem nungi junga taneptsü mangu. Ajisüaka, tang **Kabiraj H. Umar Chesam contact no. 8416087414 / 6909717178 National awarded H. Umar Chesam Address: Burma Camp 2nd Police point opp.** tetuyuba nung anidaka surgery kecha magii (non-surgical) anepalur anogo ishika tsungda ni taneptsü ngua liasü aser iba sülen tanü tashi kü temang nung timtem kecha mali. Time: 9 AM - 5 PM Yours sincerely - **Lingkatuba, Add: Fayaring**



## 'Dibrugarh City Master Plan 2045' nung NEPC-i industrial corridor atema asalentong yangludar

**Dibrugarh, October 11, 2021 (Agencies):** Ahmedabad nung amenoka aliba Nektor Engineers & Project Consultants (NEPC)-i Upper Assam kübok Dibrugarh atema

parnok indang 'GIS-based master plan' mapatong tanga rongnung industrial corridor, satellite township yanglutsü tebilemba lemsatepogo.

Atal Mission for Rejuvenation and Urban Transformation (AMRUT) kübok shimba sülen Dibrugarh City Master Plan 2045 renemtsü atema NEPC nem maparen lemsatepogo.

Tang iba master plan nung tesem kilometer 71.83 shi lir aser iba mapatong den master plan tasenba nung 2045 tashi tesem 391 sq km shi ayimjemer.

Iba master plan tasenba kübok northern boundary ji Brahmaputra ayong, Maijan awatsüing aser Greenwood tea estate asütsü. Ano, southern boundary ji Burhi Dihing ayong aser Gamon apu; eastern boundary ji Lahowal, Dikom

aser Tamulbari tea estate aser western boundary ji Modhupur village, Chawkhowa NC village, Jogoloni grant village, Kutuha Nagaon aser Baligaon asütsü.

Dibrugarh Municipal area, koba 15.5 sq km shi lir, iba area 47.45 sq km tashi atsülangtsü asalentong lir.

Iba master plan ajanga industrial corridor aser inner ring road (29 km) den külemi outer ring road (53 km) ka amenoktsü sentong lir.

Tesem trok nung satellite township tasen ka yanglutsü asoshi asalentong lir.

Tanga tongtibang inyakyim rongnung, Dibrugarh Bypass aser Trans-Arunachal highway tsungda Logistic, Truck Terminal, Goods aser Market Yard, NH-37 aser Dibrugarh Bypass intersection nung state connectivity tajungba atema Inter-State Bus Terminal (ISBT) aser Jokai Reserve Forest nung International Convention Centre, Zoo yanglutsü maparen dena lir.

GOVERNMENT OF NAGALAND

DIRECTORATE OF TECHNICAL EDUCATION

Nagaland : Kohima - 797 004

NO.DTE/SCHO 10/2019

Dated:Kohima, Oct,2021

### NOTIFICATION

Student belonging to Schedule Tribes of Nagaland pursuing Diploma/Undergraduate and Post graduate courses in Engineering (both fresh and renewal) within India, recognized by All India Council for Technical Education (AICTE) are informed that, in view of online registration, the State Technical Scholarship will be made 'Live' for the session 2021-2022. The concerned Students/ Applicants may complete the registration process w.e.f from 12th October 2021 to 12th December 2021 through the Common Scholarship Portal [www.Scholarship.nagaland.gov.in](http://www.Scholarship.nagaland.gov.in)

Sd/-

(Nungsangmenalmchen)  
Ex-Officio Director.

Issued by DIPR

## Mizoram nung nisung 307 dak Covid-19 putet

**Aizawl, October 11, 2021 (Agencies):** Mizoram nung

tesüiba ghonda 24 nung nisung ana shi Covid-19 agi süogo. Hombarnü State nung iba tesashi wara agi asür nisung 356 shi tuogo.

Kasa anogo Mizoram nung nisung 307 dak Covid-19 tashidak tasen puteta liasü. Hombarnü State nung Covid-19 positivity rate shilem 26.64% tashi atu.

TrueNAT test ajanga nisung 4 aser RAGT test agiba mapang nisung 303 dak Covid-19 tashidak tasen putet.

Tashidak tasen puteter densema tang Mizoram nung Covid-19 positive puteter nisung 106,136 shi kümogo. Tang Mizoram nung nisung

14,295 shi Covid-19 agi shirangdar. Hombarnü State nung nisung 965 shi iba tesashi wara nungi taneptsü nguogo.

Deobar nikongdang 5:00 ako tashi nung tesüiba ghonda 24 tsungda Covid-19 agi shiranga alir nisung 965 taneptsü nguogo ta Directorate of information & public relations, Mizoram-i metetdaksü.

Mizoram nung iba wara adoker külen nungi nisung 91,485 taneptsü nguogo. Deobarnü, State nung nisung 5 Covid-19 agi süogo.

Deobarnü Mizoram nung nisung 1,170 dak Covid19 positive puteta liasü. Iba anogo Mizoram nung Covid-19 positivity rate shilem 18.91% liasü.

## BLK-Max Super Speciality... (TAPAK 2 NUNGI...)

Dr Ankur Arya, Consultant - Urology, Andrology & Renal Transplant, BLK- Max Centre for Renal Sciences & Kidney Transplant ajanga Kidney Transplant nung tawa update asüba indang jembia liasü.

"Teurtem prostate, bladder mesüra testicular cancer alirtemi iba tashidak menaloktsütsü jenjang 10-12 shilem lir ta aikati jembir. Saka testsü dak breast cancer aliba jabaso tem prostate cancer agi meneptsü jenjang 15-20 shilem lir ta aikati memetet," ta Dr Ankur-i ashi.

Cancer anepalutsü aser koktettsü atema angatettsü aser awareness prokshitsü ya kanga tongtipang lir. Technology tasenba bushiteta aoba mapang tekeratiba nung tashidak putettsü ya kanga tongtipang lir, ta pai ashi.

Iba training nung Dr Bikash Gurung, Consultant- Surgical Oncology & Robotic Surgery, BLK- Max Cancer Centre ajanga Robotic Onco Surgery indang jembia liasü.

"Tanur aser tain cancer agi shiranga aliba anepalutsü atema advanced robotic surgery techniques aser procedures amshiteter. Head and Neck Cancer, Thorax and Lung Cancer, Thyroid Cancer, Gynaecological Cancer, Gastrointestinal Cancer aser Obstructive Sleep Apnoea (OSA) amala oncological cases aika anepaluba nung Robotic Surgery ya yimya tasen ka ama kümogo," ta pai ashi.

Iba CME sentong nungya discipline balala nungi health care professionals tem dena liasü.



**FILM ASSOCIATION OF NAGALAND**

PRESENTS

# ONLINE FILM COMPETITION 2021

TOPIC - THE NEW NORMAL

SHORT FILMS ARE INVITED FOR AN ONLINE FILM COMPETITION

PRIZE MONEY

1<sup>ST</sup> 25,000 & CERTIFICATE // 2<sup>ND</sup> 15,000 & CERTIFICATE  
3<sup>RD</sup> 10,000 & CERTIFICATE

SUBMISSIONS OPEN TO ALL

PERIOD OF SUBMISSION | 12 OCT TO 12 NOV

**TERMS & CONDITIONS**

- Maximum Length - 10 Minutes
- Maximum file size - 700 mb
- Film can be shot on phone or video Camera
- The contest will be open to all citizens of Nagaland except members of FAN
- Language of the Film shall be in English or in any vernacular with English subtitles
- Film Submissions can be made through the email
- Contestants should fully & unconditionally be bound to the terms and conditions of the contest

for any queries call ☎ +91 9362796640 | ✉ email : [filmassociationofnagaland@gmail.com](mailto:filmassociationofnagaland@gmail.com)



# TIR YIMYIM

## YIMOBILEM (EDITORIAL)

DIMAPUR SANGTENNÜ, MONGPUTENI(OCTOBER) 12, 2021

### Anema aliba kolok

**A**lima ka asoshi rongsen tulutibaji anema aliba sensosangertem lir, kechiyong ali telong aser tema nung ali rongsen jenti liaka, sensosanger temang anema melira item rongsentemji tagitsü kuma mamshitettsü. Ibayongji, alima kin shia nung yimteni nübortem temang anema alitsüba maparen nung kanga temulung agüja inyaker aser nübortemia anema alitsü asoshi peisasa kanga kümdanga alir. Aji oda, temang anema alitsüba shilem rongnung tongtibangtibaji tekolok ya lir. Atangji, tangobo tepokpok ajanga sashir aser chiyongtsüa tebang nungi tepini alur. Ajisüaka, tepokpok o tepin na kija anema aliba agi temangji shitak marakzötsü aser taküm liaka maparen kata shitak meinyaktetsü. Iba jagi nisung anema lidaktsütsü asoshi inyaker tashitemeteteremi loktiliba nung nisung shia tekolok shitak anema alitsü nungdakba indang kanga süoki ia jembir. Aji oda, tekolok anema alitsü nungdakba indang alima ajaklen ajungshitepa kum shia alima ajaklen October 10 nü " World Mental Health" anogomong amonger. Atangji, tekolok shitak anema alitsü indang jembir asünungji, tekolok meraksai mapa ajak nung tipdema aser züngzünga alitsüba indang jembir. Ajisüaka, asenoki aiben tekolok anema alitsü nungdakba indang jembiba ya yiaritem taküm anepalutsü indang jembir ta bilemer. Iba jagi asenoki tekolok anema alitsü indang anogomong tashi monga jembiba nung ya süoki ia mebilemer, kechiyong asenok yiar masü, tanü tashibo tekolok meraksai shitak lir, anungji tekolok anema alitsüba indang nungdak jembibaji asenok asoshi masü ta bilemer. Iba jagi asenok asoshi nungdakba teyari ana nung lir ser nung magitetter. Aji oda, tekolok anema alitsü indang jembiba ya yiar taküm indang jembir masü saka yiar masü, nüchibo nüchi aser anema lir amai saka tebilemtsü agi, shisaboluba agi, nükjidong matongba agi mesüra tangari mezüngmeshiba agi temulung mepelatet, joko lokti nung adentsü nümamedangteter, teti tejak mekümer dang alir, kecha masü nunga ain adoker, rara menar, o mashimashi jembir, chiyongtsü tali mesüra kanga ilara achir, amui tali aoer mesüra amoui moutet nukener, amatara kanga bolua akümer, kecha masü nunga tsüba bilemer ta asüba purtem tekolokji anema mali, timtem lir ta sayur. Tekolok nung timtem alirtemji kanga ratamatatsü, temulung bilembaji shitak ataloker amai bilemtsü, tang pelatsü aser ano tang ain aittsü, tangar tang masü saka peisasa yiruyipongtsüa inyaksü aser tebilemba ka sa teti bilema alitsü. Aser oda odabo mapaa meinyaknei akümtsü. Item timtem indangji kodang bilemdanga asen taküm den medemdangdir, ashiko, asenoka timtemji ka mesüra katibo asenok tekolok timtemdakja alitsüa akok. Yiarbo masü saka nisung ka taküm nung iba ama timtem aliba jagi kibong nung kodanga tesünep malir aser yimten aser lokti nunga telemtetba tajung magitet rarabangsen aser timtem kanga ataloker. Tekoloki mapa junga meinyaktsüsa asenok taküm tipmadem akümba ya, ashiko, karbo azü nungi senmang ama aruba asütsüa akok mesüra karbo kidang kibong nung mesüra loktiliba nung mezüngmeshia mesüra tsübudakja amshiba ajanga atalok asütsüa akok. Koba kuli agi südir süang, kecha kuli maka ain adoka jashiba, rara menaba, shisabolua dang aliba aser tangar den libalirutsü akmesena akümba aser amuia junga mao nükenba timtem ajakji tekolok shirangba tamaittsü lir, anungji nisunger yimya ka ama dang medoktsüi yakta, tamajungba makümdang, anepaludoktsüla. Ashiko, asenok kibong aika nung nungdak ajak peria lir saka pelatepa melitetter ta asüba timtemjia tekolok nung timtem aliba ajanga pelatepa linüaka melitetter asütsüa akok. Itemji tanga temang shilem shirangba den kasa lir, anungji nisung kolok ajanga inyakba mapatem indang metetter mongintem bushia oa teyari agitsüla. Atangji, aseni metetsümonga kecha masü ser nung mepelar, jashir, ain adoker aser tangar alidaki mouner ta asen taküm nung timtem atalokba metetra, jet ta tangar den shisalemsatepang, tangar asoshi mapa tajung inyaksü tenzükanag, mapa ajak nung tajungtsütsü bilemtsü merangang, temang arakzuka asentsü sendoka mapa inyakang, amui junga aotsü merangang aser chiyongtsü shitak mapang shitak nung chia-ajemtsü merangang. Tejangrar atemabo anogo shia osangkakettem nung adokba Ojang lutep, Olong paitep aser Sodoku ama tekolok amshia inyakba aser chess asayaba ama mapatem agia tekolok tashi itshidaktsütsü. Taküm ya tekolok agidang anishir, anungji sensosanger ajak tekolok anema aliba agidang, pei kibong nung dang masü saka yimten, lokti aser arogo nung telemtetba shitak agia loktiliba tajungba-tajungba kuma yanglutettsü.

## OLEMSABANG

Tanü tensa mapang nung tashitemeteteremi asen Ao oshi tamentakdak tera (roots) ya kanga tongtibang ta angatet nungbo, asen Ao oshi ya takar oshi rongnung ka ta meteta akümtsü.

~ R. Imkong Lkr, Mangimen.

Tanü mapang ya joko alima tashi temetet nung talangkasa oadokogo, saka tanü asen Aortem rongnung tashitemeteteremi asen Ao oshi ya kechi nung amendaker tenzük, iba tamentakdak tera (roots) tazüngji junga mangatet tashi asen Ao oshi tetezü tulu aketba aser taroktemji (deep meaning) tongtibang ta mangatettsü ta shia atar. Tanü asen Ao oshi nung lennirtem shirnoki tangar tashitemetet takar linüktem oshi apayua par "seriseken yimya" "Their way of speaking styles" nung anidaka par oshi den apet "grammar" "otong olem" amshia jembiba zülua aotang, asen Ao oshi tetenzükba (roots) tu züdoka doktsü aoba jagi aisü nung asen Ao oshi tetezü tulu aketba aser taroki ia jembiba "deep meaning" otem aika ojangtem aser orentem den meputepi kümdaktsür ta angatetdi. Yimya agi oshi ka jembibaji pei sobaliba dak ajemdaker jembir asünung tangar tashi temeteter linüktem denji asen sobaliba yimyatem aisü nung meputeptsü ta mezüngpuba nung angatettsüla. Yamaji asen Ao oshi tetenzükba ya asen detsü tebou mapang nungi koma jembiba aru, "original foundation of our ancestral language" or "how our ancestral language came into existenc" item tongtibang ojangtemji tanü tashi temeteteremi tangar oshitem den medemdanga zulutsü merangtang asen detsü tebour takar oshitem tu züdoka doktsür aotsüsa akümer, iba jagi asen Ao oshi tamentakdak tera (roots) tu loksaa yutsür aotsüsa akümer ta angatetdi. Kechiba ta süra tang shiyonga aruba amaji tanü kaketshirtemi asen detsü tebou mapang nungi jembiba aruba olen kar melenshitsuandang, tatishitsü agi kirakisü aser kebrangkübru olong kar melenshitsuoyonga aotang tetenzük nungi retreta jembiba aruba tetezü tulu keta jembiba aruba ojangtem tu kanga pungpa pungpaa kümdaktsür ta angatetdi. Yamaji asen detsü tebou mapang nungi jembiba amshia aruba oshitem tu samatsüsa akümtsü, tetezü tajungba ka akümtsü merangtang asen oshi tetenzükba takar oshi tu samatsüsa akümtsü ta metetdi.

Yangi asen detsü tebou mapang nungi jembiba aruba tejen oshitem kar ni angazüka aruba ojangtem yamai agütsür:-

1. Kangkangshishi tetezü memerükba kar.
2. Kangko kangji tetezü pangkadaktsüba mesüra ratamatataksüba.
3. Putipuin tetezü tejen otsütem tatalokba kar. Tatishitsü agi Putipuyang kaketter.
4. Ajimechutsüka tetezü sensamasatsütsüsa atalokba maparen kar.

Iba dakji alaka ano olasü ya kangasa tongtibang rongnung ka ta angatettsüla, kechiba ta süra iba olasü yagi tang asen taginüba tetezütem ya junga adokdaksür ta metettsüla. Iba olasü tang English oshi agi "Accent" ta ajar iba olasü yagi ojang kaji tekaleni saketa atuba mesüra züngzüka alubaji sayur aser idangjiang ojang jagi kechi ashir, aser aginür aser kechi tetezü atema jembir itemji rateta ashir mesüra sayur ta metetdi. Tatishitsü kar yamai agütsür, "kodak" dang English oshi agi "Heaven" ta ajar, saka aikati kodak ta zülutsü melena "kotak" ta saketa tua zulus. Iba kotak ojang ya tangar kin kari asen Ao oshi junga mangateti jembiba mesüra merangdangba mesüka lir. Yamajisa temeshi laishiba nunga "kotak" ta saketa tua zuluba angur, iba kotak ojang ya kasa tangatetba aliba lai o meyipertemi zulu ta reprangteter mesüra angateter. Aji oda, ola adokba amaji ojangjia zulutsüla, koba dang olasü ta ajar, aser English oshi agia "Accent" ta ajar, iba tebandang olasü saketa atuba mesüra züngzüka aluba mesüra lenteni aoba jagi tang tetezü shidakbaji agütsür ta angatetdi.

Aser ano yangi asenok ajaki tangar oshi kar apua (borrowed) amshiba aser olasü shidak mamshiba ojang asem indang angatettsü merangdi.

1. She (flesh) dang shi ta ajaba.
2. Joka Hindi oshi ya asen oshi kümdaktsüba.
3. Hajera walla yaa Hindi oshi ser nung asen oshi kuma jembiba angur aser angashir.

**1. SHE:** Ya asenok ajaki teti achiba chiyungtsü tongtibang rongnung ka lir, iba she ya English oshi agi "flesh" ta ajar. Iba she ojang dang asenok aikati shi ta ajar, saka iba shi ojang tenüng bener adokba alu shi temesüng tang tu ajar ta angatetdi. Anungji tang nungibo shi ta mamshie mesüra mejai she ta jadi. Aser ano she ya tali jangja angatettsü mechi nung oren ka yangludi, asenoki chiyungtang she den chiyungogo ta ashir, saka kakat nung zuludangbo alu nungi bener atokba shi temesüng ojang tusa zulus, ibaia temenünüsüka tasa bilemer.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

Odisha nung Dalit nunger Khristan kibong 5 yimdak nungi aridok



September 22, 2021 nü Odisha nung Kandhamal district kübok Lodamila yimdak Dalit nunger Khristan ki ka rongdoktsür aliba noksa nung angur.

**October 11, 2021:** Odisha nung Hindu yimsü alia amangertemi Dalit nunger Khristan pongu yimdak nungi aridokogo; Odisha nung Kandhamal district kübok Lodamila yimdak Khristanem dak azükba sülen yimdak nungi aridok.

Khristanem yimdak nungi mindokba sülen Khristan ka meyong ki bo rongdoktsü, ta Khristanem metetdaksü.

Lodamila yimdak Khristan kibong ponguji Hindu nunger kibong 45 den külemi liasü, saka parnok yimdak nungi mindokba sülen tang parnok yimdak nungi kilometer 12 shi pilar arem ka nung jenoka lidar, ta Khristan lenir kati metetdaksü.

Osangbener den jembidang Cuttack-Bhubaneswar Arogo nung ketdangser, Dibakar Parichha-i, Khristanemji kanga aoksaogo aser parnoki pei taküm atema tsübur, ta metetdaksü.

Khristanem district police station nung ken o benoktsü atema anaben tashi merangdangogo, ajisüaka police-i ken o agizüksü memelunger, ta paisa metetdaksü.

"Takoksa angurtemji onoki pusemer aser parnok nem ochi temeden agütsütsü atema onoki akokba tashi inyaksü. Takoksa angur kibongtem pei

lima nung ken o benoktsü atema lenmang bushir. Onoki akokba tashi parnok yaritsü," ta pai ashi.

"Hindu yimsü alia amangertemi Khristan kibongtem dang parnoki Khristan yimsü toktsüra yimdaki arua lidaktsütsü ta shiogo," ta paisa metetdaksü.

Kasa Arogo nungsa putir, Purushottam Nayak-i, iba yimdakji Hindu nunger aser Khristanem küm aika tesünap nung dang lia aruogo, ajisüaka 2008 küm Kandhamal district nung Khristanem anema rara adokba sülen nungi yimdak Khristanem anema inyaker, ta ashi.

September 17 nü Khristanemji Lodamila yimdak nungi aridok. Ibaji masüidang yimer tzübo nung Khristanem nem tzü metadaksüba den loki senden ajak nung Khristanembo sendoka liasü, ta Khristan putirisa metetdaksü.

Khristan kibongtem jagi Balliguda nung ken o benoktsü merang saka police-i Hindu nunger den jembia nenok sasa ken o bentetang, ta dang ashi.

Khristan kibongtemji Christian Prayer Tower ta ajaba Protestant Khristan telok nung züngsemtem lir.

"June ita nunga Rayagada district kübok Sikapai yimdak

Khristanem aridoka liasü. Iba ken oji tang tashi court nung lir," ta Nayak-i metetdaksü.

2008 küm Khandhamal nung Khristanem anema raraba mapang nung nisung 100 shi tepset, nisung 56,000 shi talidak makai aküm aser Tenla ki 300 shi raksaja liasü. India nunger puti otsü nung Khristanem anema inyakba tamajungtibaji 2008 küm August 23 nü liasü. Maoists telungpurtemi Hindu nunger lenir, Swami Laxmanananda Saraswati kasetba sülen ibaji mangyanga Khristan aika tepseta liasü.

Swami kasetba sülen Hindu yimsü alia amangertemi Khristan pezü pua azükba sülen police station-i anir ao, iba sülen Police-i masü saka Vishwa Hindu Parishad lenir, Praveen Togadia-i ang par pezüi Swami tepset, ta sangdonga liasü.

Khristanemji asalentong yanglur Swami kaset, ta tai tonglokja Hindu yimsü alia amangertemi Khristanem anema apusoba sülen hopta tenet tsüngda nung Khristan 100 shi tepset aser ki 6,000 den Tenla ki 300 raksaja liasü.

Sorkar data ajanga ashiba agi, India nunger nütsüng billion 1.2 nungi nütsüng million 201 bo Dalit nungertem lir aser India nung Khristan nütsüng million 25 nungji shilem 60 bo Dalit mesüra tribal Khristanem lir.

Iran nung ozüng tasen ka ajanga Khristanem tasüba temerenshi angutsü

**October 11, 2021:** Iran Parliament nung draft bill ka agizükogo, aser ibaji ozüng kümra tsükchir linüktem, talisa US nunger den amalitepa inyakra aser itangitba mapa inyakra aibelenertem nem tasüba temerenshi obendang agütsütsü.

Iran nunger Khristanem densema minority temi tsükchir teloktem den longjemer inyaker, ta aiben tai tonglokja arudar.

Anungji bill tasenbaji ozüng kümra Khristan aika nem tasüba temerenshi obendang agütsütsü.

Iba bill ajanga Iran intelligence ministry nem tashi tulu agütsütsü aser parnoki minority tem, talisa Khristanem anema inyaksü. Ozüng tasenba benoktsü atema committee ka tentetsü aser iba committee nungji Intelligence units, Revolutionary Guard Corps aser Army nungi tongti

ketdangsertem shimtsü.

Taküm Iran nung Penal Code yanglushiba ajanga Khristanem inyakba mapatem nung tenük tali yoktsü aser Khristanem kanga reshikangshitsü. Bill tasenba kübok Nasser Navard Gol-Tapeh, Ibrahim Firouzi aser Bita Rezaee nunger densema Khristan aika nem tasüba temerenshi obendang agütsütsü akok.

ANOGO ABEN TSÜNGREM DEN

Atetta atsüngba o

*Kechiaser Tsüngrem O taküm, aser teinyak aser anatsü nok ajak dang nungi techiraba; aser taküm o tanela tatentep aser tenüngla ya ajak ateta tsünga bendangtetba aser temulung tebilemba aser tasa asaba yakta metetba. Ibri 4:12*

Oset ana teti tatem makai alitsü: Tsüngrem O aser nübur tanela. Teyangluba nübu shia tesem ka nung tatem maka mapang intoktsü, kotak nung teti tatem maka Tsüngrem den, mesüra Tsüngrem den pilar teti tatem maka molumi nung. Yamaji Tsüngrem O teti tatem makai alitsü, "Ayi akongtsü, naro azülatsü, saka Tsüngrem O teti alitsü" (Isaia 40:8). Yisu Khrista (Tsüngrem Chir) Oji lir (Yn: 1:1, 14), aser Pa yashi, tanü aser teti kasa dang lir (Ibri 13:8).

Asenoki taküm Tsüngrem O bushidang iba yagi asenoki tai inyakba putetdaksür aser asenoki tia ajak ajangettetsüsa renemtsür. Tsüngrem Oi asenok taküm nung taroktiba tashi aitsü akoker. Kechi agi asen taküm aser tanela mesüra teloktep shia aser tenüngla tashi ateta atsüngtsü akok? Tsüngremer Oi atsüngtsü akok. Saka Tsüngremer Oi tarokba aitsü akok. Iba kaket yagi tebilemba aser temulung shisatetba ajak bendangtsü akok. Kodang asenoki tangari au ta asütsüsa langka tajung inyakdir, aser shingai asen tebilemba memetet ta asenoki bilemer, Tsüngremi metet. Kodang asenoki Khrista nukjitung sayua langka tajung inyakdir, Tsüngrem Oi ibaji jungkai adoktsür. Khrista asoshi nai ne taküm lenir asü? Ibaji inyaksü asoshi tajungtiba lejangji Tsüngremer O ne taküm nung taküm O ama lidakja aser mapa inyakdaksübaji tajungtiba lejang lir. Ibai zügang! Bushiang! Ibai tashi angang! Iba nung shisadangang! Idangji na azükarutsü aser takok angutsü (Yohan 1:8).

Kibuba, tanü ni Ne O kümdanga kü mulung nung rizüngjang. Amen.

Uttar Pradesh kübok Mau District nung Khristan 50 apu

**Mau (Uttar Pradesh),** Rajbhar'er kidang Hindu **October 11 (Agencies):** nungertem dang sarasadem agi Osang ka nung ajemdaker Uttar Pradesh nung police-i Mau district kübok Sahadatpura Colony nung aliba ki ka mita ao, aser Khristan yimsü dangi meyipba atema nisung 50 dak tema puer ao.

Amongnü shirangertem atema sarasademtsüba sentong ka nung Khristan yimsü dangi meyipdaksüba sentongji agia liasü, ta Khristanem nem tai tongloktsü.

Pastor Abraham-i Vijendra Rajbhar'er kidang tesüiba küm pongu tashi tekülem sentong ayonga agia arur, ta police-i metetdaksü.

Khristanem adenshia tekülem sentong agiba aser ozüng alema Khristan yimsü dangi meyipdaksüba sentong agibaji ashishia kiyongertemi police nem iba osangji metetdaksü.

Hindu Jagran Manch lenir, Bhanu Pratap Singh aser züngsemtemia police dang,

Rajbhar'er kidang Hindu nungertem dang sarasadem agi tashidak balala aneptsütsü ta nangzüka Khristan yimsü dangi meyipdaksür, ta metetdaksü liasü.

Khristanemisa tai maket yimdaklirtem dang yazü jembir aser mesüzüka Khristan yimsü dangi meyipdaksür, ta parnokisa aitsü.

Deputy Superintendent of Police, Dhananjay Mishra-i, tekülem sentong nung nisung aika Khristan yimsü dangi meyipdaksür, ta tai tonglokja aliba dak sendakba nung police-i nisung aika dang asüngdangyaogo, ta metetdaksü.

Parnok rongnung karbo Khristan missionary tem liasü aser karbo tang mezüng tekülem sentong nungji adenertem liasü; tang iba ken o bushisüngdangdar aser kangshia yimsü meyipdaksüba kuli ngura temerenshi agütsütsü, ta police ketdangserisa metetdaksü.



### J&K kübok Poonch nung kiralongrar den raradang sepai pongu asü



October 11, 2021 nü Jammu & Kashmir kübok Poonch district nung sepai aser kiralongrartem tsüngda raraba tesem nung sepaitem aliba noksa nung angur. Iba rara nung Junior Commissioned Officer (JCO) ka denssem sepai pongu asü.

**Srinagar, October 11** (Agencies): Tawa Jammu & Kashmir nung civilian aika tepsetba ajanga tensa mejungi aliba mapang ka nung Hombarnü Poonch district nung kiralongrartem den raradang Junior Commissioned Officer (JCO) ka denssem sepai pongu asü. osang ka ajanga metetdaksü. Hombarnep Poonch district kübok Surankote nung kiralongrartem mita aoba mapang sepai aser kiralongrartem tsüngda khatep tenzük, ta Defence otongdar kati metetdaksü. Kiralongrartemi tama injang sashia khaloktsüba ajanga JCO ka denssem sepai

### Aluyimertemi akhangba magizük tashi longkak aittsü: Rakesh Tikait

**Muzafarnagar, October 11** (Agencies): Aluyimba ozüing asem agientsü densema aluyimertemi akhangba onük ajak magizük tashi aluyimertemi longkak aittsü, ta Hombarnü aluyimertem lenir, Rakesh Tikait-i metetdaksü. Amongnü nikongdang Uttar Pradesh kübok Shamli district nung osangbenertem den jembidang pai, aluyimertemi küm ka tashi longkak aita arudar aser iba mapang nungji aluyimer 750 süogo saka Centre sorkari tekong meranger, ta metetdaksü. Yaküm September ita nungi tenzüka aluyimertem Delhi arrtsülen adenshiba sülen aluyimba ozüing asem agienang aser aluyimertem nem MSP agüjang, ta takhangba agüja arudar. Aluyimba ozüing tasen asem ya aluyimertem anema lir, saka iba onük bentettsü atema sorkari ken o jembitsü memelunger, ta pai metetdaksü. Centre nung BJP sorkari industrialists dang pusemer, ta pai aittsü.

### India-i Afghanistan tensa mita reprangdar: EAM S Jaishankar

**Bishkek, October 11** (Agencies): India-i Afghanistan nung tatalokbatem mita reprangdar, iba denji külemi Taliban sorkari UN Security Council bangzüing nung renema aliba ama aser alimai imlaba ama inyaksü imlar, ta India-i metetdaksü. Hombarnü Bishkek nung India External Affairs Minister, S Jaishankar aser Kyrgyz Foreign Minister, Ruslan Kazakbaev na senden amenba sülen külemi osangbenertem senden ka nung jembidang Jaishankar-i iba osang ya metetdaksü. Jaishankar-isa, Kazakbaev den senden amenba mapang nung Afghanistan nung tatalokbatem onük nung o lemtep aser region nung yimjung aser security alitsü atema jembii, ta metetdaksü. "Onoki Afghanistan tensa mita reprangdar, kechiyong iba ya asenok ajak atema tebilemtsü onük ka lir. (Maneni tapak 9 nung...)

### PM Modi aser UK PM nati climate aser Afghan tensa atema jembii

**New Delhi, October 11** (Agencies): Hombarnü India Ato kilonser, Narendra Modi aser UK Ato kilonser, Boris Johnson nati India-UK Agenda 2030, climate change aser Afghanistan tensa densema tongti onük aika nung o lemtepogo. Modi-i twitter ajanga, "Ato kilonser @BorisJohnson den jangratema jembii. Künati India-UK Agenda 2030 asadang, Glasgow nung taruba COP-26 atema climate change asoshi jembii aser Afghanistan densema regional onüktem reprangshiogo," ta metetdaksü. Downing Street-ia sangdong ka ajanga, lenir anati India-UK tsüngda shishilembaba aser defence atema jembii, linük ana tsüngda senzüsempogba lapoktsü aser Glasgow nung COP26 senden amentsü lia climate action nükjidongtem atema jembii, ta metetdaksü. Downing Street nungi otongdar kati, "Ato kilonser (Jhonson) aser Ato kilonser Modi nati coronavirus anema longjemmer raraba aser kanga kümdanga international travel lapoktsü atema jembii," ta metetdaksü. UK-i India nunger vaccine certification agizükba atema jembii; iba dak sendakba nung Covishield vaccine agi alir India nungertembo UK tonga aoba sülen anogo 10 nü quarantine masütsü.



October 11, 2021 nü Chandigarh nung Punjab Chief Minister, Charanjit Singh Channi-i 'Mera Ghar Mere Naam' scheme dak sendakba nung osangbenertem den jembiba noksa nung angur. Iba scheme ajanga yimdaclirtem nem kiojen temeden agütsütsü.

### Congress lenirtemi Minister of State Ajay Mishra anenang ta akhanger



October 11, 2021 nü Lucknow nung Congress General Secretary Priyanka Gandhi Vadra aser party nung inyakertemi Lakhimpur Kheri tatalokba ken o dak sendakba nung Union Minister of State, Ajay Mishra cabinet nungi anenang ta takhangba agüja longkak aitba noksa nung angur.

Kumar Mishra cabinet nungi anendakjang, ta takhangba agüja longkak ait. Iba ken o nung tai tonglokja alir tongtiji Union Minister, Ajay Mishra'er jabaso, Ashish Mishra lir. Lucknow nung dang masü saka state tesem ajungalen Congress-i longkak ait. Goa nunga Congress lenir, P Chidambaram leniba nung party-i longkak aitogo. Delhi nunga Congress lenirtem aser party nung inyakertemi Delhi lieutenant governor office anasa longkak ait. Longkak aitba sentong nungji Delhi Congress Tir Anil aser taoba mapang Union minister ana- Ashwini Kumar aser Krishna Tirath nungeria shilem agi. Ano külen aluyimertem unions-i tentetba Samyukt Kisan Morcha (SKM)-ia, onoki Centre aser Uttar Pradesh sorkar na dang October 11 tashi nung Minister of State for Home Ajay Mishra aputsü anogo latettsü saka tang tashi mapu, anungji aluyimertemi shilem lemsar maneni longkak aittsü, ta metetdaksüogo. Tan hopta tetenzüklen SKM-i sorkar dang October 11 tashi nung Minister of State, Ajay Mishra anema inyakang, mesüra parnoki shilem lemsar longkak aittsü, ta metetdakja liasü. Ano tanga osang ka nung, Hombarnü Uttar Pradesh BJP Tir, Swatantra Dev Singh-i Union minister Ajay Mishra Teni Lucknow-i jaoka Hombar nikongdang tashi nung pa ajuruang, ta metetdakja liasü. October 3 nü Lakhimpur Kheri nung rara adokba sülen Mishra-i tang tashi chief minister Yogi Adityanath aser state party Tir, Singh na majurur.

**Lucknow, October 11** (Agencies): Hombarnü Lucknow nung aliba Mahatma Gandhi kürazyanglu anasa party lenirtemi Lakhimpur Kheri ken o dak sendakba nung Union Minister for State (Home), Ajay

## Lebanon indang Zahrani tesem nung totzü ayudak mi adok



Lebanon indang Zahrani oil facility nung totzü ayudak tank ka nung mi adoka lia tangokba noksa ka yangi anguir. Hombarnü iba lendong atalokba tera tejangja ya tang tashi monguteti lir aser ketdangsürtemi bushisüngdang tenzükogo. Iba lendong nung asü-amaba osang mali aser mi ya remseptetogo.

**Beirut, Mongputeni/Oct. 11**

**(Agencies):** Lebanon indang Zahrani oil facility nung totzü ayudak tank ka nung mi tulu adokba remsepogo, ta iba linük indang energy minister-i lendong atalokba tesem nungi ashi.

"Mi ya remseptetogo," ta Energy Minister Walid Fayyad-i ashi.

Mezüngbo Fayyad-i osangbener dang army fuel tank ka nung mi jangrua lir, ta shia liasü. Pa Zahrani oil facility oa atongba sülen mi ya kechi nungi adok mesüra asaa inyakba asü masüar mejangja, ta osangbener dang ashi.

"Bushisüngdangba osang atatsüla, aser iba osang nung

ajemdaker nüngdakba meratem agitsü renema alitsüla. Tangbo nübürtem kumzüka ayuba nung temolung agütsür," ta Fayyad-i ashi.

"Zahrani facilities nung petrol aliba tank ka nung mi tulu adoka lir. Iba mi adokba kuli tejangja memetet," ta National News Agency ajanga shia liasü.

Iba totzü ayuba tesem nung mi remsepa temeket nung aliba tank nung mi kaoloka aoba nungi kumzüksü mechi firetruck 25 shi oa liasü.

Iba tank nungya benzene lir, ta Lebanese Army indang odongtar kati Hombarnü ashi.

"Onoki mi remseptsü merangba mapang anasa

alirtem azüngtettsü meranger. Danga tank tem nung mi kaolokba nungi nokdangtsü nükjidong nung inyaker," ta ketdangsüri ashi.

Zahrani oil facility nung aliba tank tem nungya Lebanese sorkari aliba petrol aser diesel rizünga ayur.

"Iba den külemi yangji army atema aser reserve stock atema totzü lir," ta Energy Researcher Marc Ayoub-i ashi.

Lebanon indang tongtipang power station ka iba anasa ya lir.

Zahrani power plant nung totzü rongmaba sülen Hombarnü nungi mapa meinyaki akum. Lebanese army ajanga par reserve stock nung yua aliba kar Deobarnü tenla agüja liasü.

September ita tatemlen rong ka nungi Iraq indang totzü tonne 16,000 iba Zahrani facility nung agizüka liasü, koba Beirut aser Baghdad tsüngta tezüngzüktep agiba sülen mezüngbuba alitsü.

Beirut nung rong anendak poksaa nisung 200 dak tema takum samar nisung meyrirjang aika yirua anasa aliba ki-o-jen raksatsür küm ka shi lir Hombarnü iba mi lendong ya ajurur.

Raksar aliba Beirut Port asadangtsü atema Combi Lift nem taa agütsür bushisüngdang südaktsü aser parnoki yangji lendong aketba oset container 58 nung küm aika yua liasü, ta bushitet.

## Rohingya nunger nem teyari agütsütsü

### UN aser Bangladesh nangzüktep

**Dhaka, Mongputeni/Oct. 11 (Agencies):** Bay of Bengal nung asetkong ka nung lia aliba Rohingya nunger refugee tem achaayangtsü aser parnok nem tekümzüka agütsütsü atema United Nations aser Bangladesh sorkar na Honibarnü tenangzüktepba ka yangluogo, ta UN sangdong ka ajanga metetdaksü. Iba asetkong nung Rohingya nunger meyrejang aika lidaktsüdar.

Bangladesh anütok tiplen jenoka aliba Rohingya nunger refugees million 1.1 rongnungi 19,000 dak tema sorkari Bhasan Char asetkongi anirogo aser UN-i ashiba agi tenangzüktepba yangluba nükjidong rongnung kaji item nisungtem nem teyari agütsü tenzüktsü atema lir. Bangladesh sorkari taoba mapang ashiba agi, parnoki iba asetkongi shilem balala küma lemsar Cox's Bazar district nung camp tem nungi refugee 100,000 anir aotsü sentong lir.

U.N. aser humanitarian teloktemi arishi küm 30 tain asetkong ya nisung alitsü atema tapet masü ta aija aruba sülen tang iba tenangzüktepba ya yangluogo. Ajisüaka Bangladesh Ato Kilonser Sheikh Hasina-i, iba asetkong ya USD million 112 intoka yanglushiogo aser lendong kecha mali ta shia arudar. Iba asetkong ya taoba mapang aiben metsünga liasü. Asetkong nung tang sea walls, mozüki, school aser mosque tem yangluja lir, ta sorkari ashi.

Honibarnü tenangzüktepba

yangluba sülen ketdangsürtemi ashiba agi, taruba ita asem tsüngda refugee 81,000 iba asetkongi anir aotsü.

UN-i iba jenjang agiba anema nokdakba mapang UN team kati iba asetkong March ita semdang aser iba sülen temulung melen.

United Nations High Commissioner for Refugees sangdong ka ajanga ashiba agi, tang tenangzüktepba tasen yangluba ajanga Rohingya nungertem Myanmar-i tanaben meyipa mao tashi Bangladesh-i kanga mulungsoa yaritsü aser nongittsü mulunga aliba tali jangjatsür

Tenangzüktepba ajanga asekong nung Rohingya nung tali renloka aoba mapang parnok ajangzüktsü atema sorkar aser UN na tali sendaktepba inyaksangshitsü lenmang lapoktsür. Kasa sangdong ajanga ashiba agi, iba tenangzüktepba meyanglu tsüngda UN-i Cox's bazaar aser asetkong nung alirtem den sensaksemogo.

Tenangzüktepba kübok parnok tekümzüka nung toktsütsü, education, skills-training, livelihoods aser health jenjang ajungkettsü densema lir, iba ajanga refugee tem libaliro jenjang ajungkettsütsü aser tarutsü nung Myanmar-i meyipa aotsü atema renemshidaktsütsü, ta sangdong ajangsa metetdaksü.

UNHCR representative Johannes Van Der Klaauw-i, organization-i asetkong semdangogo aser yipru-mopung aser tüzümsüng amala lendong nung kümzüksü atema Bangladesh sorkari infrastructure aika amenoker aliba nguogo, ta ashi.

Klaauw-isa, tenangzüktepba kübok asetkong nungi Bangladesh anüolen tip nung amenoker aliba camp tongtibai oli oratsü atema inyakyim ka latettsü, ta ashi.

Asetkong nung aid organizations amenokba sülen Refugees tem aayanga alitsü atema maongka agütsütsü.

Tarutsü nung refugee tem Bhasan Char-i ora, aji parnok mulungka nung asütsü aser parnok asenkonng nung kecha tenokdangba makai senzüdaktsütsü. Tasembuba nung onoki asetkong achaayanga yimya ya civilian aser humanitarian yimya nung asütsüla ta mulungtepogo, kechiyong iba setkong ya navy base ka ama tenzük aser tang tashi navy tem lir, ajisüaka U.N. mesera UNHCR-i inyaksangshi tenzükba sülen humanitarian aser civilian yimya benoktsüji kanga tongtibang, ta pai ashi.

Ajisüaka Rohingya nungertem timba kati iba asetkong yagi moner. 2017 küm August ita Myanmar sepaitemi renshikangshi tenzükba sülen Rohingya nunger 700,000 dak tema Bangladesh nung refugee camp-i jena ao. Parnok ya Bangladeshi nung jenoka aliba Rohingya nunger den longjem.

Bangladesh-i parnok ya Myanmar-i tanaben meyipa yoktsü merangdangogo, ajisüaka parnoki meyipa aotsü memolunger.

## Natural experiments tenzükter nem Nobel Prize in Economics agütsü

**Stockholm, Mongputeni/Oct. 11 (Agencies):**

Economists David Card, Joshua Angrist aser Guido Imbens nungertemi economic policy aser danga maparen nung kongshiba angatettsü atema 'natural experiments' amshitsü tenzükdaksüba atema 2021 Nobel Prize in Economics sempet agütsü.

Alima nung kongshiba jangjatsü atema natural experiments ajanga asangsang tensa amshir, koba danga wadang nunga amshia empirical research asendenshidaktsü.

Canada nung asor economist Card-i iba ama experiment ya US nung aliba New Jersey state nung 1990s tetenzüklen 'minimum wage' tali kumdaktsüba nung agia research agirtemi tali kumdaktsüba ajanga employment tsütsü teti takoksa ajurur ta takzua aliba tanaben reprangshitsüsa akum.

"Natural experiments ya ajaklen lir," ta Prize Committee for the Alfred Nobel Memorial Prize in Economic Sciences züngsem Eva Mörk-i ashi.

Taoba mapang Nobel economics prizes ya US nung aliba reju temi timba ngua liasü aser tang anguba ya tasen ka masü.



Hombarnü Stockholm nung Prize Committee for the Alfred Nobel Memorial Prize in Economic Sciences züngsemtemi 2021 Nobel Prize in Economics takok angur osang sangdongba mapang tangokba noksa ka yangi angur. Committee züngsemtem tekolaklen iba sempet angur Economists David Card, Joshua Angrist aser Guido Imbens nungertem noksa angur.

Card ya tang University of California, Berkeley nung inyaker, Angrist ya Massachusetts Institute of Technology, Cambridge nung inyaker aser Netherlands nung asosang Imbens ya Stanford University nung inyaker.

"Telephone call aruba atema ni süngmang aser osang angashidan aoksa. Kü tembar tajung ana den iba sempet lemsaba atema ni kanga pelar," ta Imbens-i telephone ajanga Stockholm nung osangbener dang ashi. Angrist ya Imbens

kiyimba benjong nung 'best man' liasü.

Alfred Nobel tenüng nung agütsüba iba senpet dang ya Sveriges Riksbank Prize in Economic Sciences ta ajar, koba taküm Nobel sempet ishika agütsüba rongnung tatembangba alitsü, aser iba senpet nung sen Swedish crown million 10 (\$1.14 million) lir.

"Empirical contributions to labour economics" atema Card-i senpet ya tasadang ka angu, ta academy ajanga ashi.

Angrist aser Imbens nati

"methodological contributions to the analysis of causal relationships" atema tanüngba senpet tasadang ya angu.

Science, literature aser peace tsütsü iba sempet agütsüba ya Swedish nunger dynamite ngutetsang aser shishilempar takar Alfred Nobel indang rongsen nungi agizüka agütsür.

Parnoki iba sempet ya 1901 nungi agüja arur, saka Sweden indang central bank küm 300 ajungba nungtem nung tenla agütsüba nungi economics prize ya 1969 nungi agüja arur.

## BMSCH nung 'International Day of Girl Child' mungogo

**Kohima, Mongputeni/ October 11, 2021 (TYO):** Alima tesem ajunga den jangyumedema, Sakhi - One Stop Center (OSC) Kohima den Bright Morning Star Children Home (BMSCH) Kohima longjemer Hombarñü, BMSCH Kohima nung International Day of Girl Child anogomung munga liasü, ta sangdong ajanga metetdaksü.

Iba sentong nung, Sakhi-OSC nung case worker, Repabenla Longkumer-i, Sakhi-One Stop Center indang tongmelang agi metetdaksü

## India-i Afghanistan...

(Tapak 7 nungi...)

Afghanistan tashi maitba ajanga region ajak kongshitsü. Alima linüktemi tang Afghanistan nung sorkar dang nungi UNSCR bangzüng 2593 imlar," ta pai ashi.

UNSC bangzüng 2593 ajanga, Afghan nung liji kiralongratem jenokdaksütsü, training agütsütsü aser kiralongratsü atema asalentong yanglutsü atema mamshidaksütsü renema lir, iba denji külemi UN Security Council-i kiralongratem ta sangdonga aliba Lashkar-e-Taiba aser Jaish-e-Mohammad teloktem mejenokdaksütsü akhangar.

"India aser Kyrgyz Republic nati Afghanistan tensa asadang," ta pai twitter ajanga metetdaksü.

Taoba ita Ato kilonser, Narendra Modi-ia, Afghanistan tensa nung ajemdaker linük shingai maongka magitsüla aser pei tajangzük angutsü atema memerangtsüla, ta metetdakja liasü.

Tawa New York nung 76buba UN General Assembly nung jembidang Modi-isa, Afghanistan nung litsüji kiralongra proksü aser kiralongratsü atema mamshitsüla, ta jembia liasü.

Jaishankar-i anogo pezü tsüngda linük asem-Kyrgyzstan, Kazakhstan aser Armenia linüktem semdanga Amongnü Kyrgyz Republic yimtiba, Bishkek tonga ao.

October 11-12 anogotem nung Kazakhstan nung pa 6buba Conference of Interaction and Confidence Building Measures in Asia (CICA) senden nung adentsü. Jaishankar-isa Deputy Prime Minister aser Foreign Minister Mukhtar Tileuberdi na den senden amentsü.

October 12-13 anogotem nung Jaishankar-i Armenia semdangtsü aser pai Armenia Foreign Minister, Ato kilonser aser National Assembly of Armenia nung Tir ajurua senden amentsü.

aser teburtem dang tetsür maparen, tebilemba nung pusemtsü aser tebandang melii inyaksü ajungmesoa liasü.

BMSCH indang Probation Officer (PO), Watisenla menden liasü aser sentong nung tanurtemi talent show densema entertainment balala nung shilem agiogo.

Iba Talent Show tetoktepba nung, Dolensangla (Singing)-i mezüngbuba jenjang nung takok angu. Kasa mapang, Maria Ashu (Dance)-i runner-up aser Nyiemangmongsen Chang (Preaching) second runner-up jenjang nung takok angu, ta kasa sangdong ajanga metetdaksü.

## PELAR

"Ni rara tajungji raroogo, ni alizüng tonga asemogo"

Onoki teti dang meima aliba tsürabur Asür Mr. TAKALEMBA (Mopungchuket), pa shirangba anogo nungi tasüba anogo tashi shirnokisa ozü den nübu, rongsen, shisatsü aser sarasadem agi mulungsoa yaritepa aruogo, nenok ajak dang senti rongsen dang nungia taoba tepela ozü kibongi lemsateper. Asen Takar Tsüngremi nenok ajak moajang ta ozü sarasadem.



17/08/1935 - 04/10/2021

## MULUNGNEN O

"Ni kü mulungjang ajak agi na sangdi, Oh Kibuba. Ne tesümgangtsü mapa ajak indang ni ashitsü." Tenügsang Ken 9:1.

Kü temeim kinungbo asür **A. Bendangyanger Jamir** (Unger) shirang yipden aliba mapang aser tasüba anogo tashi nung, ozü aria meima bilemer kija, kibong aser lokti balala kwi kati ali rongsen, nuboo aser tenla tajung mezüngpangteti yariba den sarasadem nung nungita yariogo, nenok ajak dang ozü kinunger ajaki kanga pelaba lemsar.

Nenok mapa tajung onok akümüli piyong kodanga mamatetsü. Tsüngremi nenok ajak dang, tang aser teti moajang ta ozü sarasadem.

**Kinungtsü, chirnur, semchir, kinunger aser anükapang.**



Aso: 11.05.1948  
Asü: 07.10.2021

## Pelaba Lemsateper



ASO: 22.08.1932 - ASÜ: 06.10.2021

"Aser Tsüngremer meimertem shirnok Pai mulungba ama ja-a lir, parnok tsügdang mapa ajak külemi tajung asoshi inyakteper ta asenoki metet." Rom 8:28


~ Temeim aketba nisung ka pilaogo, saka pa tanela kodanga masütsü ~

Onoki teti meima aliba asür **Medongsangba** (Mopungchuket), pa iba akümüli nungi pila orr onok mangyim jashi nung alidang, kinungertem, medemertem, medical staff, Arogo balala aser temolunger kwinakati temeim sayua, sarasadem, nübu, rongsen aser shisatsü agi nungitta yaria onok molung süneptsüogo, nenok ajak dang ozü pelaba lemsateper.

Nenoki temeim sayuba ajanga onok molungjang nung kanga kongshioogo aser nenok mapa tajung teti bilemtetsü. Taochisang Tsüngremi nenok ajak moajangma.

**Temeim Kibong Züngsemtem.**

## Küm 95 Ajungba Tepela Tenügsang



Mr. Purniken Longchar (Aonokpu)  
Asoba Küm: 01.10.1926

Tsüngremer angati taochi temoatsü manung küm 95 tashi anir aruba asoshi Pa tenüng asanger. Maneni onok akhüm süa alitsü taküm tajung moajang ta sarasadema atar.

**Temeim kinungtsü chirnur, semchirtem aser kinungertem**

## AOLI PONGEN TELONGJEM DIMAPUR (UNIT)

5<sup>TH</sup> BUBA LOKTI SENDEN

TESENTEPDAK : IMC HALL

Anogo: 14.10.2021

Mapang: 10:00 A.M



**NÜKJIDONG:**

**Yimden Yimli Kin Kidong Aser Sobaliba Nung Terenlok.**

### KETDANG PURTEM:

Tir : Wb. M. Tsukjem Pongen  
Tatong Tir : Wb. Tali Pongen  
Tongti Zulur : Wb. Meren Pongen  
Repsem Zulur : Wb. Arangba Pongen  
Sen Zulur : Wb. Chuba Pongen  
Sen Repsem Zulur : Wb. Aremchang Pongen  
Kimen : Wb. L. Chuba Pongen

### SENDONG

- \* **Menden** : **Ketdangpurtem**
- Lai Zünga  
Sarasademtsü : Wb. Rev. C. Alemzulu Pongen
  - Menden Okila : Tatong Tir
  - Sobaliba Ken Ka : Longsa Pongen Unit
  - Tajungshi O :  
i. Wb. Nukshimatong Pongener Extra Assistant Commissioner Dimapur Sadar (10 mins)  
ii. Wb. C. Ramok Pongen (10 mins)
  - Osangtem Agitsü :  
i. General Osang  
ii. Audit Osang  
iii. Constitutional Drafting & Nominating Committee
  - O Lemtepba Mapang:
  - Tanener Nungi Tepila O:  
i) Kimen  
ii) Ketdangpur Nungi
  - Menden Melentepba Mapang : i/c Convenor (Nominating Committee)
  - Melepszung O : Tir
  - Tatem Sarasadem : Telok

### METETDAKTSÜR

- Dimapur nung arua alir asen pongener shirnoksa, Aoli Pongen Telongjem Dimapur (Unit) nung tenüng zülua mali iba anogo nung arua tenüng zülua (membership) ayutsü metetdaksür.
- Tesenteper ajak asen Pongen Kin Jacket semer arua atentsü metetdaksür.
- Senden Timsür Chuchuyimlang Pongen Unit.
- Sentong temer telok chiyongba mapang alitsü.
- Iba sentong asoshi ajaki sarasadema atadi.

## France-i Nations League final nung Spain akok



**Mongputeni/October 11, 2021 (Agencies):** Deobar aonung San Siro stadium nung Nations League final asaya nung World champions France-i Spain kokogo. Karim Benzema aser Kylian Mbappe nati goal kaka idakja parnoki iba asaya goal 2-1 agi akok.

Didier Deschamps-i aniba telok ya asaya mezüngbuba shilem nungbo Spain-i amokbanger asaya aser Mikel Oyarzabal-i goal ka idaktsüba sülen parnok tesülen liasü, ajisüaka asaya tanabuba shilem nung France team asendenshir asaya aser parnok rongnungi midfield nung Paul Pogba-i kanga junga asayaba den Mbappe-i kanga kara asayaba aser Benzema-i goal idaktsüsü amokmerena kanga junga asaya.

"Onoki team tajung ka den kanga junga asayaogo. Onoki metoktsüi asaya. Iba ajanga team tajung kati koda maoksai mapa tajung asoshi aremzüka asayar aji sayur," ta Benzema-i ashi.

Luis Enrique-i aniba Spain team, shirnoki semifinal nung European champions Italy koka liasü, parnoki kanga atasaa ball belenshi ajisüaka tatem nungbo parnok striker takoktet ka maliba ajanga takok mongutet.

Asaya mezüngbuba shilem yabo Spain-i amokbaner asaya ajisüaka parnok goal-i idaktsütsüsa amokmeren masü. Kasa mapang nung centre-half Raphael Varane yirur aliba ajanga France team tapok adoka liasü. Ajisüaka break sülen team anaprongla künkümshir asaya.

Asaya nung mezüngbuba goal Oyarzabal-i idakja Spain pur goal ka agi tejakdang aküm, ajisüaka France-i meyiper Benzema ajanga goal ka idakja kasasa aküm. Telok ana tsünga kanga toktepa asayaa arur asaya atemtsü minute 10 anunga lir Hernandez-i agütsüba ball ka Mbappe-i kanga junga idakja parnoki asaya akok.

Spain team-i Mbappe offside asü ta ashishi saka VAR ajanga asadanga sülen defender Eric Garcia-i ball dak tera kongshiba ngutet aser France striker ya offside masü asü ta jangjatsü.

Kasa mapang nung tasembuba jenjang atema Turin nung Italy aser Belgium na asaya Italy-i goal 2-1 agi koka liasü.

## AITA-i ITF World Tennis Tour asayamung 7 sangdongogo



**New Delhi, Mongputeni/October 11 (Agencies):** All India Tennis Association (AITA)-i Hombarnü, taküm küm tatemlen ITF World Tennis Tour events tenet ayongzüka asayatsü sentong aliba sangdongogo.

Iba ITF World Tennis Tour events nung ajak senteper senpet USD 125,000 agütsüsü. Item asayamungtem ya November aser December ita asayatsü renema lir.

Mezüngbuba asayamung ya

teburtem atema M15 Indore asütsü koba November 8 nungi 14 tashi asayatsü. Tanabuba asayamung ya New Delhi nung November 15 nungi 21 tashi asayatsü, koba teburtem atemsa asütsü. Iba sülen Tour ya Gurugram nung teburtem atema November 22 nungi 28 tashi ayongzüka asayatsü. November ita atema tatembangbuba asayamung ta tetsürtem atema November 29 nü nungi tenzüka asayatsü.

December ita mezüngbuba

asayamung Solapur nung December 6 nü nungi tenzüka asayatsü. Iba asayamung ya tetsürtem atema asütsü. Asayamung nung senpet USD 15,000 agütsüsü.

Iba sülen tetsürtem atemsa Pune nung asayamung ka ayongzüka asayatsü. Asayamung nung takoker nem senpet USD 25,000 agütsüsü. Taküm küm atema tatembangbuba asayamung ya Navi Mumbai nung tetsürtem atema ayongzüka asayatsü. Asayamung nung senpet USD 25,000 agütsüsü.

2021 International Tennis Federation (ITF) Men's and Women's World Tennis Tour ya tetsür aser tebur professional tennis asayartem atema entry-level aser mid-level tour lir. Iba asayamung ya International Tennis Federation-i achayanga asayar koba ATP Challenger Tour aser Women's Tennis Association (WTA) Tour kübok lir.

## Thomas Cup: India 5-0 agi Netherlands akok

**Mongputeni/October 11, 2021 (Agencies):** India tebur badminton team-i, Thomas Cup Final, Group C nung mezüngbuba asaya nung Netherlands 5-0 agi koka asayamung tenzüko.

Deobar aonung mezüngbuba asaya nung Kidambi Srikanth-i 21-12 21-14 agi Joran Kweekel akok aser iba sülen tarep asaya nung Satwiksairaj Rankireddy aser Chirag Shetty nati Ruben Jille aser Ties van der Lecq 21-19 21-12 na koka India team 2-0 agi tejakdang aküm.

Kija asaya tanabuba nung World championship bronze-medallist B Sai Praneeth-i 21-4 21-12 agi Robin Mesman minute 27 nung akok aser India

3-0 agi tejakdang aküm.

Iba sülen tarep asaya nung MR Arjun aser Dhruv Kapila nati 21-12 21-13 agi Andy Buijk aser Brian Wassink na akok aser tatesa Sameer Verma-i kija asaya nung 21-6 21-11 agi Gijs Duijs koka liasü.

Deobarnüsa Uber Cup Final nung India tetsür team-i Spain madak 3-2 agi takok nguogo. Kija asaya mezüngbuba nung Saina Nehwal yiruba ajanga tembanga masayatet, ajisüaka team nung lanur asayartemi kanga junga asayaa iba asaya akok.

India tebur team Mongolbrnü Tahiti den asayatsü aser tetsür team Group B nung Scotland den asayatsü ataa lir.

## Tom Moody-i India coach mapa inyakner



**Mongputeni/October 11, 2021 (Agencies):** Taoba Australia all-rounder Tom Moody-i, aruya aliba T20 World Cup tembangba sülen Indian cricket team head coach mapa atema tang agi pezübenbuba apply asütsü imlar, ta media sangdong balala ajanga metetdaksü.

"Taoba mapang World Cup koker alisang aser linük balala nung coach mapa inyaka senzüsang yagi India coach mapa inyaktsü jangrara ta angateter, koba T20 World Cup tembangba sülen Shastri-i toktsüsü," ta Foxsports.com.au sangdong ka ajanga metetdaksü.

Arishi küm 56 tain Moody ya tang IPL club Sunrisers Hyderabad aser Sri Lanka indang director of cricket aser pai taoba mapanga India team coach mapa inyaktsü jangraba lemsatepogo aser pai 2017 aser 2019 küm densema asemen tashi apply süogo, ajisüaka pa khen danga masadangi aruogo.

Shastri-i India head coach mapa abentsü atema tenangzüktepba yanglur aliba T20 World Cup sülen tembangtsü aser arishi küm 59 tain coach yagi joko ojang dang inyaktsü ta shiatokogo, iba

ajanga BCCI coach tasen ka bushitsüsa kümogo.

Moody shiba 2013 küm nungi 2019 küm tashi küm tenet Sunrisers' coach liasü, pa lenisüba nung captain David Warner den longjemer parnoki 2016 küm IPL akok.

Moody ya England nunger Trevor Bayliss-i melen aser iba sülen pa SRH director of cricket asütsü shim. Moody-isa Sri Lanka team coach mapa inyakogo.

Osang ajanga ashiba agi, India team coach mapa inyaktsü jangraba ajanga season tetenzüklen Warner ket nungi captain mapa agin aser taoba asaya ishika nung pa masayadaksüi arudar.

"Sunrisers kibur ya BCCI nung kanga tongtibang lir aser iba ajanga Warner toktsür lanur asayartem anioka asayadaksütsü telemtetba agi asütsü ta bilemer.

"Warner dena IPL club aikati tongtepratepogo, shirnok pa masayadaksüba ajanga aoksar," ta kasa sangdong ajanga metetdaksü.

Warner indang asüngdanga mapang head coach Bayliss-i, lanurtem nem maangka agütsüsü atema pa masayadaksür, ta ashi.

### **BILEMDANGANG**

**"Ali rongsen agi nisung taküm malangzükteter."**